

真藏童子故問天尊空有二名是道體不是
真空不是妙理不是清淨不是究竟不是寂
滅不若通是者云何有縛

天尊曰善哉善哉如汝所問甚得機緣空有
二名雖是道果究竟真空衆生不曉染有受
著即非道果何以故一切衆生究竟清淨非
空非有非長非短若受相者則壞正真即非
本所即非道果何以故衆生非空非有云何
有知空有云何有知道性云何有知正法云
何有知究竟真藏童子及諸四衆聞比妙法
各自思惟稽首而退

无上内秘真藏經卷之四

无上内秘真藏經卷之五

洪十二

普明品

爾時

元始天尊遊居西那大福堂園形無定相或
隱或顯或麤或妙在靈解山從容自在其山
高廣逾覆法界林藪雲龍虎狼獅子毒蟲惡
獸傷害羣生噉食物命其山之內復有隱居
賢士精思修道學大乘行決定無疑護守心
城摧滅魔賊復有三萬六千衆生習其緣業
各有所趣種種不同

元始天尊處於大衆忽然變體入寶珠中寂
然不動四衆驚駭莫知所在七日七夜光景
不見猛獸毒蟲轉加興威一國男女號天叩
地無所歸依爾時真藏童子於大衆中怡然
靜慮稽顙伏地奉請天尊願救蒼生慈恩重
見懇陳未訖忽見山上光明遍照十方無極
世界地獄幽徒悉皆解脫爾時天尊坐本微
華端然不動怡神含笑威德光明猛獸毒蟲
悉皆摧滅於是
天尊告真藏童子汝當為諸大衆宣揚真藏

甚深無上妙法令諸衆生覺煩惱性達空有
心滌蕩五情生死一相有無平等真藏童子
承天尊力再昇虛變見自在於大衆中顯
智慧先說無生理慧光普照無大不通無細
不入進彼百千日月光景隨諸衆生所求皆
得無極世界有緣無緣悉皆備足信心重者
皆來聽受四衆雲集天尊變大光明清涼奇
雅顯衆生性寂靜無爲無生無滅無去無來
預有緣者皆了正法寂然悟道緣慮永斷分
別不生何以故道無二故生死無二去來無
二愚智無二高下無二取捨無二衆生迷感
假說因緣接引示迷扶欄徒步衆生根性種
種不同略說異途開爲三品上根衆生了達
身相不入道德不出生死無道德際無生死
際無人我際無塵垢際無行業際中品衆生
捨離生死貪求道德有出有入有道德際有
生死際有人我際有塵垢際有行業際下品
衆生無明障重不覺不知沉溺苦海冥冥長
夜無有出期四部大衆及諸男女汝等諦聽
善思如是慧光從何而來出入推求非內非

(C. 1) A. H. 200-10

外法然清淨究竟道場一相光明平等無二
眼入慧者達色妙理耳入慧者達聲妙音鼻
入慧者達香妙氣舌入慧者達味妙味身入
慧者達身妙身心入慧者達心妙心一切諸
法悉皆被入惡鬼毒蟲及諸邪見地獄餓鬼
穢畜畜生皆發善心冷甘露藥善男女等深
入法性自在無為善察心源皎然無礙學天
方便不捨有為不住無為功德具足成無上
道大衆疑惑有一童子名曰善音敢問真藏
童子顯天尊德宣揚慧光因緣善被為一光
周普為一切自有斯光若一光被者則從外
來一切衆生從外受得則是無常若各自有
不應又云慧光普被如是疑惑唯願決了耳
真藏童子答言汝諸大衆分明聽受我從無
量劫來發大衆願今始得聞了達因緣識諸
業報汝所問者衆生外受即是無常若各自
有不應又云慧光普被我所顯光衆生受潤
天尊大慧之光非內非外非長非短非顯非
不顯妙鑄羣生並皆蒙益所利益者一切衆
生與天尊無毫釐差別云何有外入無常云

何有光可顯又問既無差別即是天尊云何
有衆生迷惑云何有衆生受苦云何有衆生
修道答曰汝漸就迷作如此難一切衆生受
苦樂者皆是慧源與天尊無毫釐差別汝等
當行六行通六合之道何謂六合眼與色合
心不緣色不緣色故則是忘色耳與聲合心
不緣聲不緣聲故則是忘聲鼻與香合心不
緣香不緣香故則是忘香口與味合心不緣
味不緣味故則是忘味身與觸合心不緣觸
不緣觸故則是忘觸如是行行去來常一取
捨常一坐卧常一動靜常一是非常一心城
守固斷諸外賊羣邪徒黨並皆廢滅法王自
在猶如明珠內外通徹見法明淨塵穢莫深
入一相門即名大道則是法母能生諸法諸
法悉具三十二相八十一好裝嚴色身功德
具足若有善男女等靜心直念常行慈愛不
貪不欲翻却六賊入五通城破三兵陣四固
無侵得無畏力煩惱不生恩愛永斷善音等
衆歡喜歎曰善哉善哉真藏童子宣揚妙義
廣示因緣開大衆門濟沉溺苦為法梯陞為

法舟航

天尊告諸徒衆善者大士汝等莫疑真藏童
子此人無量劫來發心求道功德廣遠不可
稱量今當為汝廣說玄心密行及守舊城畫
夜巡行勿令缺漏一切衆聖常行此法此法
最妙為衆行之本吾今得道由此而悟汝等
徒衆不得懈怠勤行此行調伏六關法無有
定不可執為何以故法如幻故寂滅無生法
常變故皆無心幻生於變變生於幻變生
幻滅變生無生幻滅無滅各不相知自然解
脫衆生愚闇夜中織網自纏自縛恒處網中
三大毒蛇共同一室八劫之賊圍繞四方實
實長夜不能得出汝等徒衆勤行精進取吾
一字勿他念想何以故法無二念當知三界
之中有漏衆生無方便慧煩惱大燒炎熾難
滅種種教示終無悟解善男子汝等正念思
惟鑽煩惱性煩惱淨者得慧眼淨慧眼淨故
得方便力方便力故則六識常轉六識常轉
則無受無染無縛無解得法自在名為法王
真藏童子上白

天尊今日大衆承法威願得方便慧悟解衆生連諸根性入實相門天尊巧說善得機緣方便易解不審當來衆生受持何法云行何法何法易受何法易行何法難受何法難行天尊答曰善哉善哉汝大慈悲爲緣請益當來衆生無有慧眼汝等諦聽善思善念吾爲汝說真藏正經無生無滅當來衆生依此文義自然得解我顯一字非過去非未來非見在非內非外非長非短此一字者易受易行諸觀之法種種方便此觀第一初從教心心法不住法不住故則無定法無定法故則見道慧見道慧者即是本身不生不滅復有三種莊嚴智慧入法神通一者貪者二者嗔怒三者癡愛此三法者爲行之先證道之所何以故法無貪故貪性寂滅法無嗔故嗔性清淨法無癡故癡性解脫證此性者達三寶門入真藏法名大法王種種具足是時善音童子及諸大衆聞此妙法各自思昔所未聞今日所聞昔所未見今日所見十方衆聖甚深法藏不可思議並是天尊大慈悲力開闢

要門令衆易解爾時善音童子及諸大衆歡喜稽首而作頌曰

法王法鼓鼓無邊 四魔八賊皆降伏
我等我衆衆易悟 諸法究竟無差別
慧光慧炬炬常明 遍照羣生無遺失

大衆大行行無方 輪轉法音巧能說
羣生羣業業相親 識網迷途無真實
天尊神德德護持 善說愚夫令捨質
貪噴貪著者無求 變成真藏常歡悅
稽首稽心心正念 常行供養無虧徹

爾時天尊告諸大衆善音童子善哉善哉汝能稱歎真藏妙經勸諸徒衆勤行修習及觀慧光莊嚴六行息世機嫌不生愛結心慧明朗何以故法性淨故煩惱性淨貪慾性淨復有諸善男女雖復出家學小乘行端坐無爲日常一食教化羣生令習我業自尊自貴自是非彼名爲衆生不名善士非吾弟子吾非其師徒自疲勞終無得道我昔無量劫時亦復如是動行苦行隱於山林求道妙果累劫辛苦

道不可階後遇無上導師大喜知識爲我決疑教心迷道入五無間殺五魔賊守一不變神靈自在正念思惟悟無上道是時三萬六千衆生隨吾學道出分別城得無相理坐獅子座宣揚妙法廣濟衆生慈悲普覆汝等徒衆調伏諸相尋善知識平等正直達正世因鼓動衆生法芽增長慧眼開發方便門巧積智深成無上道復次一切諸法猶如鏡像非空非有畢竟無我復次衆生色心猶如鏡像非空非有畢竟清淨復次三乘教迹猶如鏡像非空非有畢竟解脫復次衆生三業猶如鏡像非空非有畢竟空寂善男子當知此經大乘無漏非覆相說非妄說非假說顯諸法性入實相門於諸經中最高第一復次往古劫時有五貧士常懷我慢不信經法聞此大乘而生毀謗滅三寶門不信衆生有真道性不信衆生有經妙法不信衆生無我寂滅不信衆生等大乘法不信衆生不生不滅不信衆生心大如海不信衆生等天尊行不信衆生等諸賢聖不信衆生爲大空聚如此不

信即得重病生入閻獄死入閻獄行入閻獄住入閻獄坐入閻獄卧入閻獄食入閻獄息入閻獄諸善男女各自思惟勿生不信若不達解能行真心不生毀謗此人得無量福田功德廣遠何以故法無相故法無定故法解脫故當知直心道場不壞諸法入諸妙寂不壞生死入諸實相不壞取捨入諸智慧不壞嘆癡入諸解脫不壞貪欲入諸法寶不壞是非入諸正道不壞聲色入諸福田不壞六情入諸無漏不壞五陰入諸大慧不壞四大入諸神通此法微妙終劫說之亦不能盡若有衆生知易悟者略說半字直證大乘解無上道假使說法數如沙塵衆生迷闇亦不能解說亦無量況善男子若有信心受持讀誦講說供養善解忘神洗除心垢功德廣遠不可思議爾時有一國王名曰大通甚信道德常行恭敬受持真藏妙經宣揚國內大臣子弟天下百姓悉皆受持此經當爾之時國富民豐男女歡樂壽命長遠無有天傷當知此經威神德重未有不由此經而得成道此經最

尊最貴法聞耳目為法舟航清沉溺苦為法梯陞超出五苦為法父母普度衆生為法本身悉得自在何以故十方衆聖悉共護持方便降魔顯微妙藥爾時真藏童子告善音等汝等大衆在靈解山聽天尊說有一明珠在

此山內光明瑩淨非表非內非高非下輪轉去來寂然無動汝等四衆見此珠不喜音等衆歎曰善哉善哉我等徒衆累劫求道在此山中聞有明珠未曾得見唯願大士承天尊力為顯明珠分明證實大士真藏告諸來者汝等各各反顧伏地諦思明珠自顯說此語已須臾之間光照表裏各各迷途猖狂失性人人自視絕迹無端獨脫還家自然覺悟明識寶珠非可顯詔是時天尊歡喜無量而說偈曰

我說大乘宗 分別顯諸相 方便引衆生 實光無限量 智者了分明 愚人自生謗 我顯真藏經 洗滌無明障 汝等善修行 一字中含養 諸法無定形 猶如鏡中像 寶珠非內外 冥心內神朗 功德並熏天

大乘無偏黨 十方諸聖道 受持真藏經 常行不懈怠 得成無上尊 我今說譬喻 示本假明權 衆生不信道 習業恩愛因 各行方便慈 五塵裏求尋 是時

元始天尊在靈解山宣揚半偈告諸男女善建福田修行供養不離身心而得解脫得解脫者寂靜道場入法正印證三世因成無上果復告善音童子一切衆生心性解脫身相解脫心為言教身為文字尋文逐字教迹斯忘悟此文字入解脫門證無上道善音童子

上白 天尊不審何故衆生心為言教身為文字衆生心是癡心身是闇網云何今衆生學其癡心而求闇網若求闇網而得成道衆生癡心復不知學應得成道不知學者而不成道若學癡心亦不成道何以故以癡學癡智性不登云何成道衆生癡心癡不知學亦不成道譬如木中有大火不自生必假人功方得其火衆生癡心必假導師而得悟解唯願法師

7-13-2-4

哀念我等而為我說

天尊曰善哉善哉吾為汝說諸法清淨無生無滅云何有衆生得道云何有衆生失道云何有衆生癡網而學成道云何有衆生癡心不學而得成道法無自性畢竟無我云何有

衆生差別而作此難我說文字性離則是法性解脫方便引誘令識正音證法音者無法可證無法可修無法可學無法可行無法可受究竟清淨混成非一二衆生聞此語者驚忙震懼立身無所是時善音等衆豁然意解悟大乘宗平等無二歸命忘形稽首而去

无上内秘真藏經卷之五

无上内秘真藏經卷之六

洪十三

顯功德品

是時善音童子及諸仙衆在香林園詣

天尊所聽習大乘遂生迷惑敢問一切衆生普受光者云何利益不同受生各異若俱受

者根機應等不應有難悟易悟若不等者慧光不周天尊偏說又問衆生要須此經而得

成道若無此經終無解脫

天尊曰善哉善哉如汝問者以空問空空無所問我所答者以空答空空無所答一切衆

生異類差殊諸根不等故空空無所等無所等故是名解脫衆生迷惑而不知覺悉

有慧光眼瞳不曉本性清淨心識昏迷要須此經開訣耳自耳自明淨照諸法本無差無別當知一切衆生同稟道源悟解先後譬如

玄珠道在赤水種種推求而不能得當知衆生本性空寂非空非有非內非外有心求者

終不能得無心不求亦不能得要須方便巧積慧源自然得果若言我說法者則謗正法

毀壞善根當知所說非說非說非非說平等

一相一無所相善男子汝等內行靜照慧著

空有天地成形成道德成經智者悟之仁者行之見其所不見見其所見知其所不知不

知其所知反人常見反人常聞一切有為無為悉皆而反如是行者體入大乘證成功德

善音童子及諸大衆聞如是說心地驚疑迷懼失所敢問諸法究竟非空非有云何有法

而反得入大乘既無法者云何證成功德

天尊曰我說一字反覆無端衆生虛妄妄有妄無執妄生迷妄成倒惑我說反者這妄無

妄妄有非有妄無非無如是觀者是名反本得入大乘證成功德又問衆生虛妄虛妄即

是無法無法云何可反若無法反云何有大乘可入云何有功德可證

天尊曰如是如是諸法解脫得解脫理名入大乘證成功德又問諸法解脫名入大乘證

成功德一切衆生不修不學名為大乘證成功德禽蟲雜獸不修不學名為大乘證成功

德如是一切諸法名為大乘證成功德云何有衆生虛妄云何有衆生顛倒云何有衆生

110/1A 20-4